

**REGLUGERÐ**

um breyting á hafnarreglugerð fyrir Sandgerði í Miðneshreppi, nr. 64 21. apríl 1948, sbr. reglugerðir nr. 121 27. september 1954 og nr. 194 16. nóvember 1960.

## 1. gr.

34. grein reglugerðarinnar orðist þannig:

Vörugjaldið skal reikna eftir máli eða þyngd með umbúðum, af hverri sendingu sérstaklega; brot úr gjaldeiningu telst heil gjaldeining. Fara skal eftir farmskrá skips við útreikning vörugjalds, og eru skipstjóri eða afgreiðslumaður skips skyldir til að láta hafnarnefnd í té afrit af farmskrá skipsins.

Starfræki höfnin vogar- eða mælitæki, skal allt vörumagn, sem um höfnina fer og vörugjald ber að greiða af og ekki er á farmskrá, vegið eða mælt á þeim, enda fullnægi tækin þeim lagaákvæðum, sem í gildi eru hverju sinni um mál og vog. Ef ýmsar vörur eru í sendingu, skal reikna vörugjald eftir þeirri tegund, sem hæst gjald skal greiða af.

Fyrir vigtun á vog hafnarinnar skal eigandi vörunnar greiða í hafnarsjóð vigtargjald, sem nemur 60 aorum af hverjum 100 kg. Hafnarnefnd getur þó, án þess að leyfi ráðherra komi til, breytt upphæð vigtargjaldsins um allt að 25%, til lækkunar eða hækkunar, en auglýsa skal breytinguna í Lögbirtingablaði, með minnst mánaðar fyrirvara.

Gjald fyrir mælingu, ef fram fer, skal ákveða mað samkomulagi, þar til annað verður ákveðið.

## 2. gr.

Reglugerð þessi staðfestist hér með samkvæmt lögum um hafnargerðir og lendingarbætur, nr. 29 23. apríl 1946, til að öðlast þegar gildi og birtist til eftirbreytni öllum þeim, sem hlut eiga að máli.

*Samgöngumálaráðuneytið, 11. marz 1963.*

**Emil Jónsson.**

*Brynjólfur Ingólfsson.*

**REGLUGERÐ**

um barnavernd í Mosfellshreppi.

## 1. gr.

Unglingum yngri en 16 ára er óheimill aðgangur að almennum dansleikjum auglýstum opinberlega. Aðra dansleiki er börnum yngri en 14 ára óheimilt að sækja, nema í fylgd forráðamanna sinna.

## 2. gr.

Börn yngri en 14 ára mega ekki vera á almannaferi eftir kl. 21 frá 1. okt. til 1. apríl og eftir kl. 23 aðra mánuði ársins, nema í fylgd með fullorðnum.

## 3. gr.

Um brot á reglugerð þessari og viðurlög við þeim skal fara samkvæmt ákvæðum barnaverndarlaga.

## 4. gr.

Reglugerð þessi, sem er sett samkvæmt heimild í lögum nr. 29/1947, um vernd barna og ungmenna, öðlast þegar gildi.

*Menntamálaráðuneytið, 15. marz 1963.*

F. h. r.

**Birgir Thorlacius.**

*Knútur Hallsson.*

## REGLUGERÐ

### um barnavernd í Sauðárkrókskaupstað.

## 1. gr.

Í umdæmi barnaverndarnefndar Sauðárkrókskaupstaðar er bannað að selja eða afhenda börnum og unglingum innan 16 ára aldurs tóbak, hverju nafni sem nefnist, gefa þeim það eða láta í té á nokkurn hátt eða stuðla að því, að þau neyti þess eða hafi með höndum.

## 2. gr.

Bönnuð er sala á spýtubrjóstsykri (sleikjum) og öðrum þeim sælgætisvörum, sem að áliti barnaverndarnefndar geta talizt hættulegar börnum og unglingum á einhvern hátt.

## 3. gr.

Barnaverndarnefnd skal hafa eftirlit með sjónleikjum og öðrum skemmtunum, sem börnum innan 16 ára aldurs er ætlaður aðgangur að, og skal henni gefinn kostur á að kynnast efni þeirra, áður en skemmtunin er haldin. Getur barnaverndarnefnd lagt bann við slíkum skemmtunum fyrir börn, ef henni þykir ástæða til. Um kvikmyndir fer sem segir í 41. gr. laga nr. 29/1947.

## 4. gr.

Börnum og unglingum innan 16 ára aldurs er bannaður aðgangur að almennum knattborðsstofum, dansstöðum og öldrykkjustofum. Þeim er og bannaður aðgangur að almennum veitingastofum, ís-, sælgætis- og tóbaksbúðum eftir kl. 8 að kveldi, nema í fylgd með fullorðnum, sem beri ábyrgð á þeim. Eigendum og umsjónarmönnum þessara stofnana ber að sjá um, að börn og unglingar fái þar ekki aðgang og hafist þar ekki við fram yfir það, sem leyfilegt er.

Börnum innan 12 ára er bannað að vera á almannafæri eftir kl. 8 að kveldi á tímabilinu frá 1. október til 1. maí og eftir kl. 10 að kveldi á tímabilinu frá 1. maí til 1. október, nema í fylgd með fullorðnum vandamönnum sínum.

Börn og unglingar 12—16 ára mega ekki vera á almannafæri eftir kl. 10 að kveldi á tímabilinu frá 1. október til 1. maí, og börn 12—14 ára ekki eftir kl. 11.30 að kveldi á tímabilinu frá 1. maí til 1. október.

Unglingum 12—16 ára er þó heimilt á tímabilinu frá 1. október til 1. maí að sækja kvikmynda- og leiksýningar við sitt hæfi, sem standa eigi lengur en til kl. 11 að kveldi, einnig spilakvöld og lokaðar félagsskemmtanir, sem standa eigi lengur en til miðnættis.

Foreldrum barnanna og húsbændum sem og forráðamönnum umræddra skemmtana ber að viðlagðri ábyrgð að sjá um, að ákvæðum þessum sé fylgt.